

Responce au Memoire fait par Cresnay.



Our satisfaire au premier Article dudit Memoire, ou Cresnay pense iustifier qu'il n'est pas cause du procez de Leuesque, ny de la denonciation de Menainuille par cette consideration (que la condamnation de mort de Leuesque n'eust pas destruiet les charges ny l'accusation de Menainuille contre ledit Cresnay.)

Launay-Graué, respond, que la denonciation de Menainuille ayant esté faite en vne feuille vollante, comme ledit Cresnay le reconnoist aux trois derniers Articles de son memoire, il est certain que la condamnation de Leuesque avec vn faux Testament en fuite qui accusoit les plus riches personnes de S. Malo, pouuoit bien obliger le sieur de Montauron, a ne point poursuivre ledit Cresnay, aussi bien que la fausse accusation du sieur Morer, empescha que l'on ne poursuuiust la Montarbaut. Et la fausse accusation du sieur Boisorant, a empesché que l'on n'aye poursuuiy la Marquise de Bussi, & tant d'autres que l'on sçait. Aussi il n'y auoit rien de plus facile que de supprimer des denonciations volantes.

Et pour iustifier qu'il est tres-vray que l'esperance qu'auoit donné Cresnay au sieur de Montauron a empesché qu'il n'aye esté poursuuiy: Où est la premiere diligence que l'on aye faire contre luy, ny contre Loyseau son valet.

Et pour faire voir que si l'on les laissoit en patience, c'estoit en esperance des millions qu'ils promettoient de faire venir au sieur de Montauron, n'est il pas constant au procez que Cresnay & Loyseau ont esté les persecuteurs de Launay-Graué, qu'ils ont voulu le faire prendre prisonnier, & que Cresnay a enuoyé par son frere le Vicomte de Mortaing, dès le lendemain de l'execution ce faux Testament de Leuesque au sieur de Montauron, n'est-il pas prouué que le sieur de Montauron & du Change ont dit que si Launay Graué n'estoit taxé, qu'il failloit que Cresnay le fust: N'est il pas vray que Cresnay a fait escrire par son Curé à Desburtes son Frere à S. Malo, qu'il luy a dit en substance ce qu'il deuoit escrire, & ce dès le commencement de ceste affaire, n'est-il pas veritable aussi que Cresnay a conferé avec le fils du Tertre Barré & son neveu (quoy qu'ils ne le demandassent pas) & qu'il leur dit que Tertre Barré & Tertre Ianson estoient dans ce pretendu testament qui pourtant ny sont plus aujourd'huy, Ne dist-il pas encores qu'il n'y auoit que luy qui eust coppie de ce testament, Ne fust-ce pas Cresnay qui alla à S. Malo pour composer de ceste affaire avec Tertre-Barré & le tirer du testament, N'est-ce pas luy qui dist à S. Malo que son voyage luy vaudroit plus de cinquante mil liures, & à vn Preuost plus de cent mil, pour vn homme qui auoit esté pendu à Mortaing.

Et en fin n'est-il pas vray que Ferrieres frere de Cresnay se voyant arresté prisonnier, a mandé à sa femme qu'elle fist escrire audit Cresnay son frere, qu'il n'estoit pas raisonnable que sa vie, son bien & son honneur fussent en compromis pour luy: Et outre tout ce que dessus tout le procez en general, n'est-il pas plein de circonstances & de preuues concluantes que Cresnay est l'auteur du procez de Leuesque, & qu'il l'a fait assassiner par sa seconde



espée, qui est Guimarcheres son cousin Lieutenant du Preuost de Normandie, & par Ferrieres son frere Lieutenant Criminel à Mortaing, sous pretexte de Iustice.

Au second, troisieme & quatrieme Articles, Cresnay dit en son memoire que la denonciation que Menainuille a fait contre luy, ne peut estre cause du procez de Leuesque, par ce raisonnement.

La denonciation de Menainuille, ne peut-estre que par ses Interrogatoires, le premier desquels est du 28. Iuin 1640. & le dernier du 7. Aoust ensuiuant.

Leuesque a esté accusé long-temps auparauant, sçauoir dès le 7. Decembre 1639. il a esté informé contre luy dès ledit iour, & depuis l'information continuée le 13. Iuin 1640. sur laquelle information les gens du Roy de Mortaing ont donné leurs conclusions le 20. Iuin, & le Iuge Guimarcheres son decret.

Par consequent puis que les interrogatoires de Menainuille sont posterieures à la denonciation, information, conclusions des Gens du Roy, & decret contre Leuesque, lesdits interrogatoires ne peuuent auoir donné lieu à son procez.

A ce Sillogisme ou plustost, à ce sophisme, Launay-Graué, respond que la premiere proposition est fausse, d'autant que Menainuille peut auoir denoncé Cresnay, auant que d'estre interrogé, il se peut mesme & est fort veritable, que deslors que Menainuille se resolut de prendre abolition, qu'il en donna aduis à Cresnay comme à son amy & à son complice, afin qu'il ne trouuast point mauuais s'il l'accusoit & qu'il songeast à sortir d'affaire de son costé, comme du sien il se vouloit mettre à couuert, il est certain aussi que Cresnay n'a pas seulement esté accusé par Menainuille, mais qu'il a esté denoncé auparauant par sa femme qui l'en auoit aduertty par Loyseau, & qu'il y auoit preuue contre luy de fausse monnoye, par quatre temoins.

Si la majeure est fausse en logique, la mineure l'est en pratique: Car il est plainement prouué, verifié & iustifié, que la denonciation de Leuesque n'a point esté faite le 7. Decembre 1639. non plus que la deposition de Philippes Besnier, Mais seulement le 24. Iuillet 1640. En l'information du 13. Iuin, les conclusions des gens du Roy, & le decret n'ont esté faits qu'apres que Leuesque a esté pendu: Et en cas que ces faussetez ne soient aduérées par preuues irreprochables: Launay-Graué, consent de passer pour coupable.

Les deux premieres propositions estans fausses, la consequence qu'en a tiré Cresnay l'est aussi, & pour mieux argumenter, & selon la verité il faut dire.

La denonciation du procez de Leuesque est fausse, la deposition de Besnier est fausse, l'information du 13. Iuin, avec les conclusions qui sont au pied, & le decret sont faux: Les Iuges de Mortaing ont fait ces faussetez, donc les Iuges de Mortaing sont des faussaires: vn Iuge faussaire merite la mort, donc les Iuges de Mortaing doiuent estre pendus.

Toutes ces faussetez & ses antidattes sont vtils à Cresnay: Il n'y a point au procez d'apparence qu'autre que Cresnay y eust interest, Elles ont esté faites par son Cousin Guimarcheres, elles ont esté iugées par Ferrieres son frere, donc il est tres-vray semblable que Cresnay en a esté l'autheur.

Pour responce au cinquiesme article du memoire de Cresnay où il dit: *Que la denonciation de Menainuille contre luy, quoy qu'en feuilles volantes ne peut-estre que d'uiour des interrogatoires dudit Menainuille.*

Launay-Graué a desia respondu qu'il ne s'ensuit pas, puis que Menainuille a peu denoncer Cresnay au sieur de Montauron, auant que de se faire

interroger, & Messieurs de la Chambre peuuent sçauoir que de tous ceux qui se sont presentez pour jouir de la grace : Il n'y en a pas eu peut-estre vn seul, qui n'eust dit son secret au Sieur de Montauron, auant que de le dire à son Commissaire dans son interrogatoire.

Au surplus dudit article, Launay-Graué aduoüe que cette forme d'agir est vne illusion à la Iustice, & qu'il n'y auoit personne dont l'honneur & la vie fussent en seureté, puis-que des criminels pouuoient substituer des innocens en leur place; comme il est arriué en ce rencontre, où Cresnay tout faux-monnoyeur qu'il est par le jugement de son propre frere, a voulu faire payer sa taxe à Launay-Graué & à beaucoup d'autres innocens, auxquels il eust rauy le bien, l'honneur & la vie, Si Messieurs les Commissaires de la Chambre n'eussent eu avec le zele de la Iustice, l'esprit & l'intelligence de démeller toutes les fourbes & les artifices, dont Cresnay auoit tissé cette abominable calomnie.

Pour le 6. article où Cresnay dit, *Que Menainuille ne peut faire aucune foy, & que dans son interrogatoire où il n'a pas espargné son propre frere, il n'est pas croyable qu'il eust plus de consideration pour luy : joint que l'abolition luy eust esté inutile, s'il n'eust nommé tous ses complices.*

Launay-Graué respond qu'un homme qui amende vaut mieux que dix qui empirent, c'est à dire que Menainuille est plus croyable que Cresnay; Et si Menainuille dans ses interrogatoires, n'a pas espargné son propre frere, ce que Launay-Graué ne sçait pas, il ne s'ensuit pas pour cela qu'il aye nommé Cresnay deuant le Iuge, parce que son frere ne luy deuoit point huit ou dix mil liures, & ne l'auoit point menacé de luy faire perdre son bien comme auoit fait ledit Cresnay.

Mais pourquoy Cresnay pretend-il faussement dans le septiesme article de son memoire : *Que Menainuille l'aye denoncé à l'instigation de Launay-Graué?* Et comment adjouste-il pour preuue que Menainuille l'a dit, veu qu'en l'article precedent il maintient que Menainuille ne peut faire aucune foy, & qu'au commencement de son memoire ledit Cresnay n'est pas demeuré d'accord que Menainuille l'aye accusé.

Pourquoy Cresnay dit-il dans le mesme article, *Qu'il faut presumer que Menainuille ait voulu fourber le Traictant d'une vaine esperance, & que n'osant pas denoncer un innocent en Iustice, il a voulu abuser le sieur de Montauron d'une denonciation volante afin d'auoir meilleure composition, & cependant obtenir plus facilement son Arrest d'absolution.*

Dieu ne permet-il pas visiblement que Cresnay s'aveugle dans son propre esprit, & ne signe-t'il pas sa conuiction en signant comme il a fait ce memoire, puis-que si Menainuille pour obtenir plus facilement son Arrest d'abolition a denoncé Cresnay, ce n'a pas esté sans doute Launay-Graué qui l'a corrompu, comme il a maintenu en vne grande Requeste: Et puis lors que Menainuille a eu son Arrest d'abolition, Launay-Graué n'estoit pas accusé.

Mais quelle apparence que Menainuille aye accusé faussement Cresnay, qui estoit son amy depuis vingt ans & son debiteur de huit ou dix mil liures, & avec lequel il n'auoit iamais eu de querelle ny d'animosité? Quelle apparence qu'un homme qui recourt à la grace du Roy, & qui pour sortir d'un crime, & racheter sa vie, donne son bien, s'embarasse de gayeté de cœur, se remette la corde au col en faisant vne fausse accusation?

Vos meilleurs amis Cresnay ne presumeront iamais que Menainuille vous aye denoncé faussement pour perdre son bien. Mais ils croiront la verité lors qu'ils iugeront que vous Cresnay vous voyant accusé, vous auez

voulu fourber le Traictant d'une vaine esperance de millions, & que vous mesme vous vous estes trompé, lors que vous avez creu profiter de vostre crime en adjoustant la mort du pauvre Leuesque, & tant de faussetez à vostre fausse monnoye; parce que la grace que le Roy faisoit, n'estoit pas pour des assassins, pour des faussaires, & pour des calomnies de la nature de la vostre: Quoy que vous osiez encores dire, que le pis qui vous puisse arriuer, est d'en sortir pour de l'argent.

S'il estoit permis de parler de tout le procez, Messieurs les Commissaires scauroient par aduance que le denonciateur estoit vn gueux, mendiant de porte en porte, & vn enfant de l'aage de quatorze ans qui a fuy avec son pere à la veuë de Monsieur le Commissaire dans le pays, & qui a esté pris chez le beaufrere de Cresnay: Messieurs scauroient encores que Leuesque estoit vn fol insensé, prouué tel par plus de cent tesmoins depuis l'aage de douze ans iusqu'à l'aage de vingt-six ans qu'il a esté pendu: Messieurs scauroient encores que les Iuges de Mortaing sont des concussionnaires, qui exercoient vn brigandage public dans le pays, & que cette verité est prouuée par plus de cent autres tesmoins, & par le iournal de Bachelot trouué dans sa poche lors de sa capture, où le partage de quelques concussions qu'ils auoient fait est escrit, & reconnu par ledit Bachelot. Messieurs scauroient que de douze pieces dont est composé le procez de Leuesque, il n'y en a pas vne seule veritable, ny en leurs substances ny en leurs dattes: Qu'en douze pieces faites & fabriquées en douze iours, il y a eu cinq Greffiers, Bachelot, Iouaut, le Breton, Langelier & le Vannier; Bachelot est vn faussaire condamné par Arrest du Parlement de Normandie, Iouaut demeure d'accord de la fausseté que l'on luy a fait faire, le Breton est en fuite, Langelier aduoie sa fausseté semblablement, & qu'il estoit prisonnier lors que l'on l'a fait seruir de Greffier, & Vannier a escrit vn Testament qu'il n'a osé signer, où il a mis qu'un autre auoit seruy d'adjoinct, de la teneur duquel il n'a jamais entendu vn seul mot de l'accusé. Messieurs scauroient que la duplicité & la falsité du Testament est prouuée par dix tesmoins, par la piece propre, par des circonstances & resultances du procez, necessaires de necessité absolue, & ce qui est merueilleux, par la signature propre des Iuges: Messieurs scauroient que les Iuges de Mortaing ont fait cent faussetez, pour appuyer celle du Testament, comme celle d'un bail faux, de plusieurs memoires apostez; Et enfin Messieurs scauroient que ce procez est tout plein des plus horribles meschancetez que l'on puisse imaginer, & que sur vn crime l'on ne vid jamais tant d'abominations assemblées.

